

Ganda usaha demi kemajuan silat

Persisi perlu kukuh sokongan, dokongan dari badan kerabat



“Kewujudan sebuah badan induk dapat membantu. Bagi seni silat di negara ini, kita ada Persisi. Seperti juga dalam bidang-bidang lain, cubaan dan dugaan adalah asam garam sesuatu pergerakan. Keadaan ini ketara dalam masyarakat Melayu-Islam di negara ini. Silat juga tidak terkecuali.”

Kalau Mendaki disaingi Persatuan Karyawan Islam, Majlis Pusat ditandingi oleh kerabat-kerabat, Persisi juga tidak terlepas daripada cabaran. Keadaan ini tidak menghairankan kerana kita hidup dalam satu zaman penuh persaingan.”

— Encik Mohamad Maidin Packer Mohd.

PERSEKUTUAN Silat Singapura (Persisi) perlu menggandakan usaha untuk mengukuhkan sokongan dan dokongan daripada badan-badan kerabatnya.

Ia perlu menyatupadukan 17 badan kerabatnya, dan mengadakan usaha-usaha yang boleh membawa kepada perkembangan yang membina untuk seni silat di sini.

Berucap ketika merasmikan seminar silat anjuran Persisi semalam, Setiausaha Parlimen (Penerangan dan Kesenian), Encik Mohamad Maidin Packer Mohd, berkata:

“Kalau Mendaki disaingi Persatuan Karyawan Islam (AMP), Majlis Pusat ditandingi kerabat-kerabat, Persisi juga tidak terlepas daripada cabaran.” **21 OCT 1991**

Bagaimanapun, sebagai badan induk silat, Persisi memainkan peranan sebagai penyelarasan dan penggerak utama perkembangan dan kemajuan seni silat.

“Dalam tahap selanjutnya, Persisi perlu menggandakan usaha untuk mengukuhkan sokongan dan dokongan daripada badan-badan dan perguruan yang menjadi kerabatnya,” kata beliau.

Selain daripada seminar silat anjuran Persisi itu, satu lagi seminar silat akan diadakan Ahad ini oleh Persatuan

Wanita dan Teruna (Perwanit).

Dalam seminar yang diadakan di balai rakyat Kampung Ubi semalam, Encik Mohamad Maidin juga memberi beberapa saranan:

■ Mengembangkan silat di Singapura:

Perkembangan seni silat di balai rakyat perlu diberi perhatian memandangkan bertambahnya kegiatan silat di balai-balai rakyat dan penyertaan orang ramai.

Pada 1980, terdapat 27 kelas silat di balai-balai rakyat dengan seramai 540 peserta.

Tahun lalu pula, terdapat 57 balai rakyat yang mengadakan 125 kelas silat dengan seramai 2,541 orang menyertainya.

■ Memainkan peranan di peringkat antarabangsa:

Pertubuhan silat di sini perlu mendapatkan penyertaan golongan terpelajar setempat, yang dapat memainkan peranan memimpin kemajuan seni silat di peringkat antarabangsa.

■ Menyusun senaman si-

lat:

Senaman silat yang sedang dijayakan oleh Persisi boleh dibuat dalam bentuk video dan buku panduan untuk membolehkan penyertaan yang lebih luas.

■ Meningkatkan mutu persilatan:

Wadah yang sesuai perlu disediakan bagi membolehkan wasit juri, instruktur dan guru silat untuk saling bertemu, bertukar fikiran dan pengalaman dengan tujuan mencari jalan memajukan lagi seni silat.